

Regional News Unit AIR Aizawl
Thursday, April 11, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizoram Lok Sabha inthlan atana campaign chu ngawrh taka kalpui mek a ni.
- Kumin Lok Sabha inthlanpuiah mi zawng zawngin ko-kim taka vote an thlak theuh theih nan kum 85 chinte leh vohbikte tan mahni in lum atanga vote thlak theihna ruahman chu kalpui mek a ni
- YMA rorelna sang ber dawttu, Central Coordination Committee (CCC) chu a vawi 99 nan nimin khan Aizawl Bawngkawn South YMA Hall-ah an thukhawm.
- President, Droupadi Murmu-i'n Eid-ul-Fitr pualin ram mipuite chibai a buk.



CAMPAIGN

Mizoram Lok Sabha inthlan atana campaign chu ngawrh taka kalpui mek a ni a, Political Party leh an candidate-ten theihtawp chhuahin mipui vote ngawrh takin an zawng mek a ni.

MNF, MP Candidate, Pu K.Vanlalvena chuan MP atan thlan tlin a nih chuan Party mal tana thawk tur ni loin mipui tan theihtawp a chhuah chhunzawm tur thu a sawi.

Nimin khan Lawngtlai Press Club-a chanchinbumite a kawmnaah he thu hi sawiin Pu K.Vanlalvena chuan State sorkar chuan a hmang tangkai duh a nih phawt chuan MP-a thlan tlin a nih chuan theihtawp a chhuah tur thu a sawi a. MNF Party behchhana Candidate a nih a ngaih thu sawiin, Party behchhan nei mah se Mipui Candidate a ni, a inti.

Lok Sabha MP atan thlantlin a nih chuan India rama hnam tenau zawk te, Sakhaw tlem zawkte nekchep an nihnaah an hmaa ding tur a ni tih sawiin, Zofate rorelna pakhat hnuuia an awm theih nana hmalak chu Politics a luh chilh chhan leh a tum lian ber a ni, a ti.

MLA hlui Pu TT Zothansanga pawhin nimin khan Khawzawl tlawhin, Congress Party Candidate Pu Lalbiakzama vote turin mipui a sawm a. Khawzawl Vengthara chanchinbu mite a kawmnaah Pu TT Zothansanga chuan tun inthlan hi Mizoram, hnam leh sakhua a nghin avangin a pawimawh zual a ni, a ti a. Forest Conservation Amendment Bill 2023 hmanga Central sorkarin silai tel lova Mizo mipuite ram a chhuh ta chu a paw a, MP ten awka pakhat mah an nei ngam lo chu a mak a ni, a ti a. Sakhaw zalenna turin INDIA Alliance lam tang vote a tul, a ti.

Lok Sabha inthlan lo awm tura BJP MP candidate Pu Vanlalhmuaka, Mizoram State BJP President ni bawk chuan nimin khan Kolasib Press Club-ah chanchinbumite a kawm a, India hmarchhak State pariat zingah State BJP President ni lai MP candidate awm chhun a nih thu leh MP candidate atan Prime Minister Pu Narendra Modi leh BJP National President Pu JP Nada-ten duhsakna an hlan thu a sawi a. India hmarchhakah tlangmi tlin ngeina tur MP seat 5 a awm thu sawiin, chung seat atang chuan a tan Union Minister nihna chance a that thu leh Minister a nih theih chuan Mizoram leh mipuite tan hmasawna tam tak a thawh dawn thu a sawi a. Kolasib District chu a Home District a nih angin District chhunga chengte chu an vote hlu tak hlan theuh turin a ngen a ni.

Pu Lalthansanga, Minister chuan Election Campaign-in Hachhek biala Tuidam, Kawrtethawveng, Zawlnuam leh Kanhmun te a thawh a. Kumin MP inthlan hi ZPM chuan a la thutak hle a, Zoram pumah theihtawp an chhuah a ti a. An Candidate Pu Richard Vanlalmangaiha chu Zoram hmasawna pawchhuak turin an ring tawh a, ZPM sorkar a chak lehzuah theih nan hnehna sang tak a chan theih nan vote pui turin mipui a sawm a ni.



HOME VOTING IN PROGRESS

Kumin Lok Sabha inthlanpuiah mi zawng zawngin ko-kim taka vote an thlak theuh theih nan kum 85 chinte leh vohbikte tan mahni in lum atanga vote thlak theihna ruahman chu kalpui mek a ni a; Hnahtial District, South Tuipui bial huam chhunga mahni in atanga vote thlak dilna thehlutte nimin khan vote thlaktir an ni a. South Tuipui Biala dilna thehlut mi 7 te hi kum 85 chunglam vek an ni a, South Vanlaiphai-ah mi 4, Muallianpui-ah mi 1 leh Hnahtial khaw chhungah mi 2 an ni.

Champhaiah chuan kum 85 chung lam leh rualbanlote tana in lama vote thlak theihna chungchang inzirtirna, home voting training thawh hnihna leh a hnukung ber zawh fel a ni a, naktuk atangin Champhai District-ah Home Voting kalpui tan a ni ang.

Champhai District-ah home voting dilna lut pawmsak mi 134 an awm a; heng zinga 133 hi kum 85 chung lam niin, rualbanlo 1 a awm a. Home voting kalpui tur hian Mobile Polling Team 16 ruat an ni a, heng bakah hian reserve team 4 ruat an ni bawh a. Team tinah hian member 4, Polling Official 2, Micro-observer 1 leh Security Personnel 1 zel an awm a ni.

Election Commission-in a chhinchhiah dan chuan Mizoramah kum 85 chung lam vote nei mi 4,741 an awm a, rualbanlo (PwD) voter 3397 an awm bawh a. Persons with Disabilities, zaa 40 chin rualbanlohna neia Disability Certificate neite tan an duh chuan anmahni in atanga vote thlak theih nan ruahmanna siam a ni a, vote an neihna District Election Officer hnenah anmahni bialtu BLO-te kaltlanga dilna thehluh tur a ni.

Hetihlai hian, venhimna lama hnathawktu service voter 4,963 te hnenah e-postal ballot thawnchhuah a ni a. Heng Postal Ballot hi service voter-te awmna hmuna print chhuah a ni ang a, vote an thlak fel hunah Returning Officer hnenah an thawn dawn a ni. Service voter hi mipa 4872 leh hmeichhia 91 an awm a ni.



CCC MEETING

YMA rorelna sang ber dawttu, Central Coordination Committee (CCC) chu a vawi 99 nan nimin khan Aizawl Bawngkawn South YMA Hall-ah an thukhawm a; Central YMA President Pu Lalhmachhuana'n a kaihrui.

Thutkhawmah hian nikuma YMA Inkhawmpui Lian vawi 74-na, Biate-a rorel hrang hrang - YMA khawih 6 leh sorkar khawih 1 te bawhzui dan tarlan a nih bakah bawhzui zel dan turte sawiho a ni a. Kum 2023-2025 chhunga YMA Kumpuan 'Ram leh hnam humhalh' bawhzui dan hrang hrangte tarlan a ni bawh.

Inkhawm kaihruiatu Pu Lalhmachhuana chuan palaite chu ruihhlo do kawnga theihtawp chhuaha tan la tur te, Mizorama phalna nei lova hnam dang sumdawngte leh lirtheia sumdawng hnam dang tam ta lutuk te enfiah kawnga hma la zel tur te, tuihna humhalh kawnga mahni awmna theuha theihtawp chhuah tur tein a chah a ni.

Central Coordination Committee (CCC) thutkhawmah hian Central YMA hruaitute bakah Sub-Hqrs YMA aiawh, Group YMA aiawh leh Aizawl City Branch aiawh mi 220 an tel.

<><><>

MNF MEETING

Mizo National Front Elected Office Bearer, National Core Committee, PAC, Adviser, General Secretary te leh Secretary te chu Mizo Hnam Runah Lok Sabha Inthlan Campaign kal mek thlirin nimin khan an thukhawm a, hmalak chhunzawm zel dan tur an ngaihtuahho.

Kalkhawmte hian Zoram Mipui Candidate hova Zoram dung leh vang fang kuala Campaign rusum thlaknaah beiseina an nei sang tih an sawi a. Zoram mipui Candidate a nih anga mipuiten lawm tak leh phur taka an lo dawngsawng thin chu Pathian hnathawhah an ngai a. Candidate chhuanawm tak leh huaisen, ram leh hnam tana tlanche ngai lo thehchhuah a ni chu beiseina sang tak neihtirtu a nih thu an sawi baw. Chutihrualin hmabak thui tak a la awm a, Pathian leh mipui zara hnehna chan a nih ngei theih nan theihtawp chhuah zui zel t̄ul an tih thu leh phur taka beih zel an tum thu an sawi hlawm a ni.

Kalkhawmte hnenah thuchah sawiin MNF President Pu Zoramthanga chuan Politics-ah a lawmawm zawnga thil thlir thiam a tul, a ti a; chu chu mipui pawhin an lawm zawk fo va, Zoram mipui Candidate atan Pu K.Vanlalvena an nei chu an vanneihpui ngei a beiseiawm, a ti. Mipui rilrem tak MP ni mek, huaisen leh ram leh hnam tana inpe tak a nihna te mipuiin an hriatpui avangin mite ngaihzawn a hlawh em em a ni, a ti a. Mimal, a chhe zawnga insawisak vak vak chu thil hrisel lo leh a hnam ang pawha hmel tibaltu a nih theih avangin chin ni lo se, hetiang uar thin pawlte ze chhe tak chu ching ve lo turin MNF party mipuit a chah a. Mipui Candidate Pu K.Vanlalvena inhnamhnawih reng reng lohna Kolkata-a Mizoram House hmun nuam zawk leh zau zawk, lian zawk leh dawng hlawk, remchang zawka sak tum avanga a hlui tihral chungchang te nasa takin tu te'n emaw an vawrh vel mek a ni, a ti a. Hralh tum hun laia engmah sawi duh lovin mipui rilru hruaikawi an tum mek a ni, a ti.

He hun hi MNF MP Election Campaign Directorate Chairman, Pu Tawnluia'n a kaihrui a ni.

<><><>

CADC BUDGET SESSION

Chakma Autonomous District Council 11-na Budget Session, thutkhawm hmasa berah Bill pahnih, The Chakma Autonomous District Council (Constitution, Conduct of Business, etc.) (Seventh Amendment) Rules, 2024, leh The Chakma Autonomous District Council (Management and Control of Cremation and Burial Grounds) Bill, 2024 te pass a ni.

Bill pass tak zinga pakhat zawkah hian House Leader leh Chief Executive Member, Pu Rasik Mohan Chakma chuan CADC (CCB etc.) Rules, 2002 siam thatna tur engemaw zat a rawt chu a tel a.

Heta langsar tak pakhat chu Chakma tawnga Oath of Affirmation member-te tana siam bakah CADC Executive Member-te tana Oath of Secrecy siam a ni.

Bill dang, The Chakma Autonomous District Council (Management and Control of Cremation and Burial Grounds) Bill, 2024 hian ruang hal leh phum dan tur ruahmanna siama khaw tinah ruang halna hmun tlanglawn te uluk taka enkawl leh control a tum a ni.

Nimin khan CADC Chariman Pu Mohan Chakma kaihhruiin CADC Session hi neih chhun zawm a ni a. House Leader leh Chief Executive Member, Rasik Mohan Chakma chuan kum 2024-2025 chhunga Chakma Autonomous District Council Budget a pharh a. Budget hi tun thla ni 16 khian sawiho a pawm tum a ni ang.

Kum 2023-24 chhunga Supplementary Demand for Grants chu Normal Grants-in-Aid hnuai hlawh lakah Cheng Nuai 2656 Sing 8 Sang 6 a ni a. Kum 2023-2024 sorkar kum chhunga Local Receipts chu Cheng Nuai 147 Sing 2 Sang 4 a ni a, target Cheng Nuai 159 Sing 7 Sang 5 a ni.

CEM chuan Cheng Nuai 12 Sing 5 Sang 1-a tlakchham chhan chu brick siam chhuah loh vang te, market atanga fee lak tlem vang te, building atanga a luah man dawn that loh vang te a ni, a ti a. Kumin chhunga sum lak luhna tur budget target tihhlawhtlin chu ngaih pawimawh a nih tur thu a sawi. Financial year hmasa lama budget allocation ang lo takin kuminah hian State sorkarin Salary leh Non-Salary a hranin a tarlang lo tih a sawi a, Village Council Remuneration tih loh chu salary head nena khaikhin chuan Cheng Nuai 67 Sing 3 Sang 6 leh non-salary head Cheng Nuai 77 Sing 9 Sang 8 a ni. Hlawh atan mamawh leh Grants-in-Aid pangngai chu cheng Nuai 19,793 Sing 4 Sang 9 vel nia chhut a ni.

<><><>

PRESIDENT MURMU - ID

President, Droupadi Murmu-in Eid-ul-Fitr pualin ram mipuite chibai a buk.

President chuan, ram chhung leh ram pawna cheng India mipui zawng zawng, a bikin Muslim unaute chu Eid-ul-Fitr pual hian chibai bukin duhsakna a hlan a. Ramadan thla chhunga chaw nghei leh tawngtai hun tawp ber ni, Eid-ul-Fitr hian hmangaihna leh inunauna thuchah mi a hriat thartir, a ti a. Inpumkhatna, ngaihdamna leh khawngaihna a tipung a, Eid hi mi rethei leh harsa zawkte tanpuia an hnena hlimna semchhuahna hun a ni, a ti bawk. He kut hian nun muanawm tak nei tur leh khawtlang tana thawk turin min fuih a ni, a ti a.

Eid-ul-Fitr lawmna lawmawm takah hian hmangaihna, ngilneihna leh lainatna rilru thehdarh turin ram mipuite President Droupati Murmu-i chuan a sawm a ni.

<><><>